

IN THE TRADITIONAL RIGHTS COURT  
REPUBLIC OF THE MARSHALL ISLANDS

ATIKOL KIOS, ) CIVIL ACTION NO. 2000-080  
)  
Plaintiff, )  
)  
vs. )  
)  
KOLEJ KIOS, ) MELELE KO REKADU ILO CASE IN  
)  
Defendant. )  
\_\_\_\_\_ )

Ro iuan panel eo an Traditional Rights Court (TRC) im rar ronjake case in, Civil Action No. 2000-080, rar Associate Judge Berson Joseph, Associate Judge, Billiet Edmond, im Chief Judge Riley Albertter, eo im ear komane ronjake eo. Ronjake in ear koman ilo Courthouse eo ilo Uliga, Majuro Atoll. Ran ko ronjake in ear koman rar January 4 - 5, 2001.

A. Kajitok ko jaki mantak bwe Court in an manit en iuaki rej elajrak einwot in:

1) Won eo ekkartata bwe en kabwijer maron eo an alab im senior dri-jerbal ilo Tobikien Weto?

a. Jea eo an alab ej Atikol Kios. Unin, kinke Atikol ej leo erittotata nejin kar alab eo manlok, Nead.

b. Ikijien jea eo an senior dri-jerbal ej Kolej Kios. Un eo, kinke Kolej Kios ej leo edriklok jen Atikol im nejin Nead.

c. Jinen juon bamle, emaron ke kaliaik ro nejin jen aer jolet maron ko an ion bwidrej? Eban wot im ban. Uak in ej bedbed ilo mol in bwe wawein in ejanin wor ilo bwebwenato in mantin Marshall. Manit in ej kalikare, "*Jined ilo Kebo*"

B. Etan Dri-kamol ro an dri-abnono eo im ia ko rej jokwe ie:

1. Atikol Kios (Dri-abnono), Rita, Majuro Atoll
2. Order Kios, Ajeltake, Majuro Atoll

C. Etan Dri-kamol ro an Dri-jumae abnono im ia ko rej jokwe ie:

1. Jimmy Kios, Arrak, Majuro Atoll
2. Kolej Kios (Dri-jumae abnono), Laura, Majuro Atoll

D. Menin kamol ko jet im rar dreton:

1. Plaintiff's Exhibit No. 1 - Menmenbwij eo an Nead

E. Wawein ko jet rej aikuij in bar alikar:

1. Menmenbwij eo im an Nead ej lukun kalikar lajtrak in Atikol Kios im

Kolej Kios.

2. Mantin jolet maron ion bwidej - Manit in *Jined ilo Kebo* im manit in

*Bedbed ijin Bedbed ijen.*

Lemnak eo an Court ear jarjar kinke ilo menmenbwij eo an Nead ear kalikar bwe atikol im kolej rej jem-jan-jem-jatin. Rej nejin Alab Nead eo im ear alab ilo weto in, Tobikien im ebar ejelok elikintok. Leo eritto ej Atikol Kios im ekkar non manit e eo ekkar bwe en binej jenkwon Alab Nead ilo jea eo an alab, im Kolej Kios eo edriklok en lale jea eo an Senior Dri-jerbal. Elane ear wor juon jatin Nead kora ak man, inem e eo enaj kar bok jea eo an alab im leo nejin Nead erittotata enaj kar senior dri-jerbal. Enin ej mantin jolet maron ion bwidej. *Jined ilo kebo* ej juon manit eo im ej kwalok kin yokwe eo elab an ro jined non ro nejier. Mene ro nejin renaj jab bokake ak rube buruon, botab joun jinen enaj

inebata im illu ak kin an lab an yokwe ro nejin, eban kaliaik er ak watok er ej jab nejin. Kin menin, nan watok bwe jinen Atikol Kios, Nead, ear kaliaiki einwot juon nejin, ebin watoke einwot juon mol kinke wawein in ejanin wor ilo bwebwenato in Marshall im manit ko an. Ekkar nan naan in kamol ko an Order Kios, ear kwalok bwe Atikol ear jab bed ion Majuro in ke jinen ear mij. Ekkar non dri-jumae abnono eo, ear kwalok bwe kinke leo jein ear jako jen ien mij in, innem eban jolet maron ko an jinen, Nead, ak e wot bwe ear lale im kauiki. Manit in *Bedbed ijin Bedbed ijen* ej bar kabin bwe mene juon enaj jako jen ien ko rellab an juon bamle, einwot mij, ej jab melesen bwe maron ko an renaj jako ak eban jolet maron ko ekkar non manit.

Ilo naan in kamol ko an dri-jumae abnono eo, ear kwalok mokta bwe lia in an Atikol ear juon men eo ear koman jen an jab bokake ijilok ko an jinen im Leroij Tarjikit. Ear wonmanlok wot im kwalok bwe enin ej unin an bobrae Atikol Kios, kinke jineirro ear kwalok naan in bwe aoleben ijo ko jikin, Atikol en jab jurlok, ijoko im ej alab ie im e (Kolej) enaj kejbarok wot naan eo an jinen. Ijo wot ke, tokelik Kolej ear kwalok bwe jikin eo drein im ej jab konan bwe Atikol en jurlok ej Tobikien, ak ne jikin ko jet iumin mojen eo an Kaibuki ejelok an problem ijekein. Ilo watok naan in kamol kein an Kolej Kios, ebin an Court in lo mol eo.

Kin ien, naan kein an Nead rar koman, ekkar nan naan in kamol ko rej ilo kotan kein 1960 nan 1975 eo. Ilo kalimjek kottan kein, enanin aoleb kalimur ko rej koman ilo pepa. Order Kios, driktata nejin Nead, ilo naan in kamol ko an make, ear kwalok bwe ejelok naan


ear ron an jinen kwalok kin jibokwe ak lia in an Atikol ke ear jokwe iben ilo Ajeltake. Kolej  
wot ej kwalok bwe jinen ear jiron e kin wawein kein.

Kin menin, lemnak eo an Court in ej enin bwe Atikol Kios eo ej alab rainin im Kolej  
Kios ej senior dri-jerbal eo ekkar non lajrak.

Ran: 02/12/01




RILEY ALBERTTER  
Chief Judge, Traditional Rights Court  
Republic of the Marshall Islands




BERSON JOSEPH  
Associate Judge, Traditional Rights Court  
Republic of the Marshall Islands

**FILED**

FEB 12 2001

  
ASST. CLERK OF COURTS  
REPUBLIC OF MARSHALL ISLANDS



BILLIET EDMOND  
Associate Judge, Traditional Rights Court  
Republic of the Marshall Islands